

# KUTULA NA NTONI



Tata ya Mazulu ya kusakumuka, na Mvwandulu ya Mpeve-Santu dezia awa, beto ke belama na Ndinga ya Nge ya Santu. Mpe ata ti na ndinga ya mbote ve mu ke meka na kutuba, mpe kutuba bampova na malembe mpe na kieleka mutindu mu lendaka, Mu ke lomba lutwadusu ya Nge ya Kinzambi mpe kupakulama ya Mpeve-Santu kutambula na kati ya beto na nkokila yayi. Mpe bika ti Yandi Yina kele bisika nionso, bika ti Yandi kubaka Ndinga ya Nzambi mpe Yandi kupesa Yawu na konso ntima, kaka mutindu beto kele na nsatu. Bika ti Yandi kudisa beto na nkokila yayi, na bima ya mbote ya Nzambi.

<sup>2</sup> Mpe na nkokila yayi, na ntangu beto ke tubila Ndinga, bika ti bantima ya beto kuvwanda na bakilometre mingi na kati ya Calvaire, kisika Yesu futaka ntalu yina ya kulunga yina lombaka balusambusu ya nene ya Nzambi, na disamba ya Eden. Mpe bubu yayi bika ti beto kuzaba ti beto kele ya kunungisama ya mpamba na nzila ya mvumbukulu ya Yandi, mpe na nzila ya lufwa ya Yandi, kuzikama, mpe mvumbukulu.

<sup>3</sup> Mpe na nkokila yayi beto kele diaka ve ya yinza, samu ba me sumba beto na ntalu ya Menga ya ntalu ya Mwana ya Nzambi. Mpe ti beto, na bantima yina ke vutula matondo, kuvutuka na Nge na nkokila yayi, na mabanza ya beto nionso mpe ngolo, mpe yina kele na kati ya beto, mpe kusadila Nge na ntima ya kuvedila, ya kukondwa mvindu.

<sup>4</sup> Sala ti na nkokila yayi, Tata, kana ya kele na bayankaka awa yina me zaba Nge ve, na pardo ya masumu ya bawu, bika ti na nkokila yayi bawu kwisa na kukikulumusa na kulunsi, mpe ba fungula masumu ya bawu kuna na Nzambi yina kele ya kieleka, samu na kulemvokila bawu. Mpe bika ti yayi kuvwanda nkokila mosi ya nene samu na beto nionso. Beto ke lomba yawu na Nkumbu ya Mwana ya Nge, Mfumu Yesu. Amen.

<sup>5</sup> Ntangu yayi beto me bakula ti ya ke na mosi ve, na ntoto, yina kele na kiyeka ya kulunga na kubaka Ndinga ya Nzambi mpe kumonisa Yawu pwelele, samu Ndinga me sonama na lutwadusu ya kimpeve. Mpeve-Santu kele Nsoniki ya Ndinga.

<sup>6</sup> Mpe ntangu ba lombaka mosi, na Zulu, na kubaka Buku mpe kubuka Bidimbu, ya vwandaka na mosi ve na Zulu, ata mosi ve na ntoto, ata mpe na nsi ya ntoto, yina vwandaka ya kulunga na kubuka Bidimbu, to mpe kutala Buku. Mpe ya vwandaka na Mwana-dimeme Kuna yina kufwaka kubanda mbandukulu ya yinza, mpe Yandi kwisaka mpe bakaka Buku na diboko ya Yandi yina vwandaka na Zulu ya Kiti ya kimfumu, mpe bukaka Bidimbu mpe zibulaka Ndinga.

7 Mpe beto ke kwikila na nkokila yayi mpe beto ke tula kivuvu na Yandi, ti Yandi ke zibula Ndinga samu na beto, mpe na ntangu yayi mutindu mu ke tanga na kapu 2 ya ba-Actes.

8 Mutindu mu ke pesa, nkokila ya ntete vwandaka *Nkwizulu Ya Zole*, mpe . . . ya Mfumu Yesu, ya vwandaka na Kilumbu ya tatu. Mpe Kilumbu ya yiya vwandaka *Munkayulu Ya Kulunga*. Mpe nkokila ya Kilumbu ya tanu vwandaka samu na *Mulemvo Ya Kulunga; Kulunga*. Beno bakulaka yawu mazono na nkokila? *Kulunga*, wapi mutindu beto lenda vwanaka ya kieleka kukondwa kifu mpe ya kulunga na ntuala ya Nzambi! Mpe na nkokila yayi ya kele samu *Kutula Na Ntoni*. Mpe mbasi, *Mvumbukulu*. Kaka mutindu bilumbu ke landana.

9 Ntangu yayi mu me soola na nkokila yayi, samu na lutangu ya Masonuku, kuna na Buku ya ba-Actes, kapu 2 mpe nzila ya 25, 26, mpe 27, na kati. Mpe Yawu ke tangama mutindu yayi, Pierre ke na kutuba.

*David, na yina me tadila yandi David tubaka mutindu yayi, ntangu nionso mu vwandaka tala Mfumu na ntuala ya munu, yandi kele na diboko ya munu kibakala, samu ti mu tekita ve na boma:*

*Na yina ntima ya munu ke na kuyangalala mingi, mpe mu ke na kuyimba na kiese nionso; nzutu ya munu ke zinga na kati ya kivuvu:*

*Samu ti nge ke bika ve moyo ya munu na difelo, mpe nge ke bika ve Kisadi ya nge ya Longo kupola na kati ya ntoni.*

10 Wapi mutindu ya masonama ya kitoko na nkokila yayi, samu na kubaka dibanza ya Yandi na kuvwandaka na ntoni.

11 Kima ya ntete beto ke zola kumona . . . kubenda bukebi ya beno, kele Ndinga ya Nzambi yina ke kubwaka ve. Nzambi ke zitisaka Ndinga ya Yandi, konso kisono. Mpe na nkokila yayi beto ke zola kukanga mabanza ya beto na zulu ya yawu, ti Nzambi ke zitisaka Ndinga ya Yandi. Beto lenda kupema na kivuvu samu na konso kima yina Nzambi me tuba na kati ya Ndinga ya Yandi, ti ya kele Kieleka. Mpe lukwikilu ke pemaka ve na zulu ya putulu ya mabanza ya muntu to théologie ya muntu, kasi ya kele na kisika ya nsuka ya kupema na zulu ya Ditadi ya Ndinga ya Nzambi ya Kukonda nsuka yina ke ninganaka ve.

12 Ndinga! Kana Nzambi me tuba yawu, ya kele Kieleka ya kukonda nsuka. Yandi lenda ata fioti ve kusoba yawu mpe kutuba, “Mu zolaka ve kutuba mutindu yina.” Mu lendaka tuba mambu mpe beno lendaka tuba mambu, na manima beto fwana kusoba yawu, samu beto me tuba yawu na luzabu ya beto nionso mpe na kiyeka ya beto nionso. Kasi, na yina, Nzambi kele kieleka ya kuswaswana na beto. Yandi kele ya seko, na yina Yandi ke tubaka ve kima mosi kana ya kele ve kieleka ya kulunga. Yandi fwana ata fioti ve kusoba yawu, Yandi fwana ata fioti ve

kulomba pardo samu na yina Yandi me tuba. Ya ke vwandaka ntangu nionso, Kieleka.

<sup>13</sup> Ata mpe Yesu, na bilumbu yayi ya nene yina beto ke na kukembila, ntangu Nzambi kufwaka Mwana ya Yandi samu na masumu ya yinza, ya vwandaka ntangu yankaka bamvula mafunda na ntwala ti mbandukulu ya kuvwanda. Nzambi tubaka Ndinga, mpe Yawu kele diambu yina me salama kuna na Zulu ntangu Nzambi me tuba yawu; ya me salama dezia. Oh, kana beto lendaka kaka kusimba yina ya zola kutuba, na yina beto zolaka kuvwanda bantu ya luswaswanu! Kumona na kati ya Babuku ya Yandi, balusambusu yina ba me tula na kati awa samu na muntu yina ke tumama ve, ya ke sala ti muntu kufimpa ntima yandi mosi, ngunga na manima ya ngunga; mpe ya ke sala ti muntu ya kusungama kusepela, ngunga na manima ya ngunga, samu na kutanga masakumunu yina Nzambi silaka samu na muntu ya kwikama. Mpe beto lenda kupema na kivuvu ti Ndinga nionso ya Nzambi ke salama, kukanga kaka moyo ya beto na zulu ya yawu. Ya ke vwanda ntangu nionso mutindu yina.

<sup>14</sup> Ntangu Nzambi tubaka na Noé, kuna na yinza yina ya ntama mingi; ntangu yankaka na ntwala Biblia mosi kusonama, to Biblia yayi, na mutindu nionso, me sonama; Nzambi tubaka na Noé ti kitembo vwandaka kwisa, mpe bamasa ke kufika ntoto. Mpe kukondwa ditono mosi ya nzikisa ti ya ke salama, mambu nionso ya kuswaswana, Noé bakaka boma, mpe yandi tungaka nzaza, yandi yidikaka yawu. Yawu vwandaka samu na kuvulusa dibuta ya yandi mpe yandi mosi. Nzambi kuyambulaka yandi ata fioti ve, samu ya vwandaka Ndinga ya Yandi. Ya fwanaka kusalama ntangu Nzambi me tuba ti ya ke salama.

<sup>15</sup> Ntangu yayi, ntangu Job, Buku ya kulutila ntama na kati ya Biblia, yina me sonama ntangu yankaka na ntwala Génèse kusonama, mpe ya vwandaka na kati ya Biblia. Mpe Moise sonikaka Génèse. Job, na kati ya Buku ya yandi, yandi pemaka na mutindu ya kieleka na zulu ya nsilulu yina Nzambi salaka yandi. Mpe yandi telemaka na lweka ya dikabu ya yandi ya kuyoka, kukondwa boma na kati ya ntima ya yandi; na kuzabaka ti, yina Nzambi me tuba, Nzambi ke na kiyeka ya kusala yawu. Mpe ntangu mambu nionso monanaka ya kuswaswana, Job telemaka ngwi samu nsilulu ya Nzambi vwandaka ngwi. Nzambi pesaka nsilulu na Job, mpe Job pemaka na zulu ya nsilulu yina.

<sup>16</sup> Oh, kana dibuundu lendaka kukuma na kisika yina ti ya lendaka ya kieleka kupema na zulu ya Ndinga ya Nzambi ya Kukonda nsuka ti ya kele Kieleka! Wapi luswaswanu ya ke vwanda, wapi malongi ya ke vwanda, yinki kuzenga ya ke vwanda, yinki kiese ya ke vwanda, yinki ngolo ya ke vwanda, ntangu babakala na bakento ke ndima Nzambi, yina Yandi me tuba kele Kieleka. Kukondwa kutala mutindu mambu ke monana, ya ke na kima mosi ve ya kusala na yawu. Nzambi me tuba mutindu yina; ya me sukisa yawu!

17 Mpe Job, ntangu yandi vwandaka na ntangu ya kumekama ya nene ya nzingulu ya yandi nionso; kuna ba monaka yandi, na Mvwandulu ya Nzambi, muntu ya kusungama. Ata mpe Nzambi tubaka ti yandi vwandaka ya kulunga. Ya vwandaka na mosi ve mutindu yandi na ntoto. Mpe Satana kuzwaka bweso ya kumeka yandi, na kutubaka, “Mu ke sala ti yandi kusinga Nge na ntwala ya Nge.”

18 Mpe ya zolaka kubaka luzingu ya Job, mpe ya zolaka kusala yawu, kasi Nzambi tulaka ndilu, Yandi tubaka, “Nge lendaka kusala mambu nionso na yandi, kasi, kubaka luzingu ya yandi ve.”

19 Na yina ntangu Job kumaka na ntangu ya lukanu ya kumekama ya nene, yandi tubaka, “Mu zaba ti Mukudi ya munu kele moyo, mpe na bilumbu ya nsuka Yandi ke telama na zulu ya ntoto. Ata ti misobi me bebisa nzutu yayi, kasi na nzutu ya munu mu ke mona Nzambi.” Ata ti ya ke monana mudidi, mpe ata ti ya ke monana ya kieleka ve, ya vwandaka na kima mosi yina Job vwanisaka moyo ya yandi na zulu ya yawu, nsilulu ya Kukonda nsuka ya Nzambi. Oh, kana beto lendaka kaka kusala yawu! Beno tala, yandi pemaka na zulu ya nsilulu, “Mu zaba ti Mukudi ya munu kele moyo.”

20 Mpe mu zola ti beno kusimba yawu, samu na bandinga yina ke zola kutuba na ntwala, Job kukubikaka kisika ya yandi ya luzikulu. Mpe ntangu Job kufwaka, ba zikaka yandi mutindu kuna.

21 Ya vwandaka na muntu yankaka, na nkumbu ya Abraham, yina bakaka Nzambi na Ndinga ya Yandi. Mpe yandi kwikilaka Nzambi. Mpe yandi bokilaka bima yina vwandaka ya kuswaswana na nsilulu yina Nzambi pesaka yandi, mutindu ti ya vwandaka ve. Yandi bakaka Nzambi na Ndinga ya Yandi. Mpe ntangu bilumbu lutaka, mpe basabala mpe bangonda, ata mpe bamvula lutaka, yina vwalangisaka ata fioti ve Abraham ata fioti. Biblia me tuba, “Yandi tekitaka ve, na kukondwa lukwikilu, na nsilulu ya Nzambi; kasi yandi vwandaka ya kukwikama, na kupesaka lukumu na Nzambi.”

22 Na yina nionso monanaka, konso kilumbu, ti ya vwanda kuma mingi mpasi konso kilumbu; kasi na kisika ya kukuma ya kulemba, Job vwandaka baka ngolo konso kilumbu. Oh, wapi kivuvu ya lusakumunu beto ke na yawu! Ntangu mpasi ke zola kumata samu na kusala diambu, yina Nzambi silaka, diambu yina lendaka kusalama ve; na kisika ya kubaka boma, kuvutuka na yinza, beto fwana telama diaka ngwi kulutula mutindu beto kele, na zulu ya MUTINDU ME TUBA MFUMU. Ya ke sukisa diambu, ntangu Nzambi me tuba kima mosi.

23 Mpe Abraham bokilaka bima yina vwandaka, mutindu ya vwandaka ve, samu ya vwandaka ya kuswaswana na Ndinga. Mpe ntangu Abraham zimbisaka chérie mpe kento ya yandi,

Sarah, na manima ya kuzinga bamvula mingi kintwadi, yandi sumbaka kitini ya ntoto pene-pene na kisika yina ba zikaka Job, mpe ba zikaka Sarah. Beno ke kukiyufula samu na yinki? Ba vwandaka bapofete! Ba vwandaka mona! Ba vwandaka solula na Nzambi! Mpe ntangu yayi na ntangu Abraham kufwaka, ba zikaka yandi na Sarah.

<sup>24</sup> Ntangu yayi, yandi zolaka ve ti bampangi yayi kupesa yandi kitini ya ntoto yina. Yandi sumbaka yawu, na ntwala ya bambangi. Wapi kifwani ya kitoko ya mbotika. Yandi sumbaka yawu, na ntwala ya bambangi, ti ya vwandaka kima ya yandi. Oh, ya ke mutindu yina mukwikidi ya kieleka lendaka kwisa, ya kele ve kukota na kinsweki kuna na nsongi, kasi kutelama na ntwala ya bambangi, “Mu kele mbangi ya Mfumu Yesu, mpe ya Mpeve-Santu, mpe ya bisalu ya Yandi ya nene,” mpe ya kulutula mingi diaka mutindu beto ke mona kilumbu ya yimbi me belama.

<sup>25</sup> Mpe na manima ntangu mwana ya Abraham, ya vwandaka Isaac, nsilulu pesamaka na yandi. Mpe ntangu Isaac kufwaka, ba zikaka yandi na Abraham. Mpe Isaac butaka Jacob.

<sup>26</sup> Mpe ntangu Jacob vwandaka . . . kufwaka kuna na Egypte. Kasi beno tala, na ntwala yandi kufwa, yandi tubaka na mwana ya yandi ya profete, Joseph, “Kwisa awa, mwana, mpe tula diboko ya nge na luketo ya munu ya kutengama.” Na yina beno bambuka moyo wapi mutindu yandi vwandaka ya kutengama, ya kele samu Wanzio ya Mfumu simbaka luketo ya yandi, mpe yandi bandaka na kutinguna kubanda kilumbu yina. Yandi tubaka, “Tula diboko ya nge na zulu ya luketo ya munu, mpe zenga ndefi na munu na nzila ya Nzambi ya batata ya beto, ti nge ke zika munu ve awa na Egypte.” Samu na yinki? Oh, ba vwandaka na Ndinga, ba vwandaka na luzayikisu!

<sup>27</sup> Mpe bika mu telama awa, samu na kutuba ti dibuundu ya Nzambi ya moyo me tungama na zulu ya luzayikisu ya Kinzambi; ya kele ve na zulu ya denomination, ba-organisation, ya kele ve na zulu ya ba-credo to malongi, kasi na zulu ya Kieleka ya kimpeve yina me monisama ya Nzambi ya moyo.

<sup>28</sup> Abel, na disamba ya Eden, ya vwandaka na yawu ntangu dibuundu kubandaka. Wapi mutindu yandi zabaka samu na kunata mwana-dimeme? Samu na yinki yandi nataka ve bambuma mutindu Caïn salaka? Kasi ya monisaka na yandi!

<sup>29</sup> Yesu tubaka na mbala mosi, Yandi tubaka, “Nani bantu ke tuba ti Munu Mwana ya muntu kele?”

“Bayankaka me tuba Nge kele ‘Moïse,’ mpe ‘Elie,’ mpe nionso yina.”

Yandi tubaka, “Kasi Nani beno ke tuba Mu kele?”

<sup>30</sup> Beno me mona, ya ke pema ve na zulu ya yina muntu yankaka ke banza, ya kele yina beno zaba ti ya kele Kieleka. “Yinki *beno*

ke tuba?” Kiuvu yina lendaka kwisa na mosi na mosi ya beto na nkokila yayi, “Yinki beno ke tuba?”

<sup>31</sup> Mpe Pierre tubaka na nswalu nionso, kukondwa keti-keti, yandi tubaka, “Nge kele Klisto, Mwana ya Nzambi ya moyo.”

<sup>32</sup> Mutindu Yesu Yina zabaka binsweki ya bantima nionso, samu Yandi vwandaka muntu yankaka ve kasi Yehowa me monisama na kati ya nzutu, mpe Yandi tubaka, “Nge me sakumuka, Simon, mwana ya Jonas, samu ti nzutu mpe menga ve me monisa yayi na nge, kasi Tata ya Munu yina kele na Zulu me sala yayi. Mpe na zulu ya ditadi yayi Mu ke tunga Dibuundu ya Munu, mpe mielo ya difelo lendaka ve kununga Yawu.”

<sup>33</sup> Mpe beto bantu mutindu beto ke kwisa, beto ba-Luthérien ke zola kutambula na lukwikilu, beto ba-Methodiste ke zola kuboka samu na kuzwa Yawu, beno ba-Pentecotiste ke zola kutuba na bandinga ya malu-malu samu na kuzwa Yawu, kasi yina kele na million kumi ya ba-kilometre na Yawu.

<sup>34</sup> Ya kele luzayikisu ya Kinzambi ya Mfumu Yesu Klisto, Persona ya Kuvwanda ya Yandi me monisama na kati ya ntima, “Na zulu ya ditadi yayi Mu ke tunga Dibuundu ya Munu, mpe mielo ya difelo ke nunga Yawu ve.” Ya ke sala na mutindu ya kulunga na Matthieu :24, 5:24, to, Santu 5:24, “Yandi yina ke kuwa Badinga ya Munu, mpe ke kwikila na Yandi yina fidisaka Munu, kele na Luzingu ya kukonda nsuka; mpe yandi ke kwisa na lufundusu ata fioti, kasi yandi me luta lufwa na Luzingu.” Ya kele ve samu beno vwandaka na kuningana mosi, emotion mosi; kasi samu beno me kuzwa bweso ya kuvwanda na Klisto yina monisamaka pwelele na beno kuna na Zulu, “Na zulu ya ditadi yayi Mu ke tunga Dibuundu ya Munu.”

<sup>35</sup> Na manima, Jacob, ntangu yandi kufwaka, mwana ya yandi kangaka nzutu ya yandi, mpe yandi zikaka yandi na Abraham, Isaac, Sarah, mpe Job, na Bantoto ya Santu, na Palestine.

<sup>36</sup> Na manima, Joseph, yina vwandaka profete. Yandi tomaka kuna na Egypte. Yandi zabaka Nzambi. Nzambi Yandi mosi monanaka na yandi. Mpe ntangu yandi kufwaka, yandi tubaka, “Beni zika mikwa ya munu awa ve, kasi beno tula . . . ntangu . . . Kilumbu mosi ya kieleka Nzambi ke kwisa kutala beno!” Samu na yinki? Yandi pemaka swi na zulu ya Ndinga ya Nzambi na Moïse, “Bamvula bankama yiya ba ke sadila yinsi yayi, kasi mu ke basisa bawu.” Yandi pemaka swi na zulu ya Ndinga.

<sup>37</sup> Mpe yinki kifwani ya kitoko awa, kana beno ke bakula. Ba-Hebreux nionso vwandaka luta kuna, ba vwandaka bula bawu fimbu na mukongo, na bantwadisi ya bampika. Mpe ntangu yandi talaka mikwa ya profete ya yandi, Joseph, yandi zabaka ti kilumbu mosi ba ke basika. Na yina, mikwa yina bikalaka kuna samu na lubambuku, ti kilumbu mosi ba ke basika.

<sup>38</sup> Ya me luta bamvula kumi na tanu to kumi na nana ntangu Billy Paul, mwana-bakala ya fioti ya bamvula pene ya tanu,

ntama mingi ve ya me lungisa . . . Beto vwandaka na mwa fololo yina beto vwandaka nata na ntoni ya mama, na suka-suka na suka mosi, na Paki, kaka mutindu mwini vwandaka kwisa, ya vwandaka basika; to kaka na ntwala tongo kutana, ya vwandaka, na yina beto vwandaka kwenda na kisalu. Mpe na yina beto kwendaka kuna na ntoni, mwana yayi ya fioti katulaka yimpu ya yandi na yina beto vwandaka kwenda na kisika ba zikaka leki ya yandi ya kento mpe mama ya yandi. Mpe yandi bandaka kumanga na kutala mpe yandi bandaka kudila, mpe yandi tubaka, “Papa, mama kele kuna na kati ya dibulu yina?”

<sup>39</sup> Mu tubaka, “Ve, mwana. Yandi kele ve kuna na kati ya dibulu yina. Yandi kele mbote mingi bambala ba-million kulutila nge na munu.”

Yandi tubaka, “Mu ke mona diaka mama?”

<sup>40</sup> Mu tubaka, “Na lemvo ya Nzambi, kana nge me zola yawu, nge lenda mona yandi diaka.”

Yandi tubaka, “Nzutu ya yandi ke basika ve na ntoni yayi?”

<sup>41</sup> Mu tubaka, “Cheri, kanga meso ya nge, mpe mu ke tuba na nge mwa disolo ya fioti. Bamvula bankama mingi me luta, na suka yayi, ya vwandaka na ntoni yina bikalaka ya mpamba.” Mu tubaka, “Ya kele lubambuku samu ‘bayina me lala na luzolo ya Nzambi Klisto ke nata na Yandi ntangu Yandi ke kwisa.” Kukondwa kivudi ya ntembe, mu me pema swi na zulu ya nsilulu ya Kukonda nsuka ya Nzambi!

<sup>42</sup> Na yina Job ya ntama, ntangu beto ke kuwa ti “mbombi na mbombi, mpe putulu na putulu,” ya ke bambuka munu moyo na Longfellow, yina tubaka:

Kutuba na munu ve, na bantalu ya mawa,  
Luzingu kele kaka ndosi ya mpamba!  
Mpe moyo kele ya kufwa yina ke na kulala,  
Mpe bima kele ve yina ba ke banza.

Yandi tubaka:

Yinga, luzingu kele kieleka! Luzingu kele ya  
kieleka mingi!  
Mpe ntoni kele ve lukanu ya yawu;  
Samu nge kele putulu, nge ke vutuka na  
putulu,  
Ba me tuba yawu ve samu na moyo.

<sup>43</sup> Ba ke bokila yawu théophanie, ti ntangu beto ke katuka awa beto ke kwenda na kisika yankaka. Nionso yina ya lendaka vwanda, mu ke baka Ndinga ya ntumwa, ntangu yandi tubaka, “Kana tabernacle yayi ya ntoto to kisika yayi beto ke kuzinga me beba, beto ke na mosi dezia ke na kuingila, kukatuka na *yayi* samu na kukota na Yina.”

<sup>44</sup> Abraham, Isaac, Jacob, Job, baprofete nionso, ba vwandaka na kivuvu mpe ba kwikilaka ti mvumbukulu mosi ke kwisa,

ti Mukudi mosi ke kwisa. Ba pesaka profesi samu na Yandi. Enoch pesaka profesi samu na Yandi; yandi pemaka swi, yandi kangaka kimbangi ya yandi na yawu. Isaac, Jacob, Daniel, Jérémie, Ezéchiél, ba pemaka swi na zulu ya ntangu ti Mesiya ke kwisa.

<sup>45</sup> Mpe bawu kufwaka mpe mioyo ya bawu kwendaka na Paradiso. Ba lendaka ve kukwenda na Mvwandulu ya Nzambi, samu (beto me mona yawu mazono na nkokila) menga ya bangombe mpe bankombo lendaka ve kulolula masumu; ya vwandaka fika kaka masumu, na kuzonzaka samu na kilumbu ya Munkayulu ya kulunga; samu menga yina keke na kati ya niama lendaka ve kuvutuka na musambidi, na yina yandi zolaka ve kusukisa na kupesa minkayulu ya mutindu yina.

<sup>46</sup> Kasi ntangu Mwana ya Nzambi kufwaka, Luzingu yina vwandaka na kati ya Yandi vwandaka ya muntu yankaka ve kasi Nzambi, samu na kuvutuka mpe kupesa beto lukumu ya bana na kati ya dibuta ya Nzambi. Mpe ntangu yayi beto keke bana ya Nzambi, Luzingu yina me katuka na Menga ya Yandi.

<sup>47</sup> Ntangu yayi beno tala na nswalu nionso, mutindu beto ke landila. Ntangu kuna na Ngwisani ya Ntama, mpe bayina kwikilaka mpe sambilaka, mpe kufwaka na Lukwikilu, ke vingila ntangu yina. Ya keke samu na yawu bapofete yina salaka mutindu yina, mpe zolaka ti ba zika bawu na Palestine, ba zabaka ti mvumbukulu zolaka ve kuvwanda na Egypte. Ya zolaka vwanda na Palestine, kaka.

<sup>48</sup> Yawu yina mu ke tuba na nkokila yayi: Mu keke na bankumbu ya mutindu na mutindu; mu ke kipe ve yina bantu ke bokila munu, yina zola tuba kima mosi ve samu na munu. Kima mosi kaka mu ke zola kusala, keke kuzaba yayi: ti mu me kufwa, mpe luzingu ya munu me bumbama kati na Klisto, na Nzambi, mpe ya me tulama kidimbu na Mpeve-Santu; ti ntangu Yandi ke bokila na kati ya bantu ya kufwa, mu ke vutula mvutu kilumbu yina. Beno zika munu kati na Klisto, samu bayina keke kati na luzolo ya Klisto Nzambi ke nata Yandi kilumbu yina.

<sup>49</sup> Wapi mutindu beto ke kotaka kati na Klisto? Ba-Corinthien ya Ntete kapu 12:13, “Na Mpeve mosi beto nionso me botama kati na Nzutu mosi, beto me kuma bisi ntoto ya Kimfumu ya Nzambi.” Beto ke tuba ti beto keke bizieti mpe banzenza na zulu ya ntoto yayi, kaka, na kusosaka ve bima yayi ya yinza, kasi na kusosaka nkwizulu ya Ntinu ya kusakumuka samu na kuyala na zulu ya domaine, kubanda na mubu tii na mubu ya kukondwa nsuka, ntangu Yandi ke kwisa na nkembo ya Yandi. Ya kieleka, beto ke sosa Nkwizulu ya Yandi.

<sup>50</sup> Mpe na yina kukondwa ntembe na mabanza ya munu, kasi yawu yina Yesu vwandaka na yawu na mabanza ya Yandi ntangu Yandi vwandaka awa na zulu ya ntoto, ya vwandaka kukondwa kubwa yina ya Ndinga ya Kukonda nsuka ya Nzambi. Na yina,



beto me zaba ti na kati ya Yandi me vwanda muvimba ya Bunzambi kati na Nzutu. Muvimba ya Bunzambi vwandaka na kati ya Yandi. Yandi vwandaka Tata, Mwana, mpe Mpeve-Santu, kasi Yandi zingaka na mutindu ya muntu; théophanie ya Nzambi, kifwani ya nene ya Nzambi yina Yandi salaka muntu na kati, na manima Yandi tulaka yandi na kati ya ntoto. Yandi vwandaka na nzutu. Nzambi kele ve kukondwa nzutu. Nzambi ke vwandaka na nzutu, mpe ya me fwanana na muntu. Moïse monaka yawu, bayankaka monaka yawu ve, mpe ya vwandaka ya kufwanana na muntu.

<sup>51</sup> Mpe ya ke kaka kifwani, *yayi* kele, ya yina Yawu kele. Mpe bima nionso na zulu ya ntoto, kitoko, lembami, kitoko ya ntoto, ya ke kima yankaka ve na yinza kasi mvutu na yina ya mbote mingi kulutila yina, ya ke vingila beto ntangu beto ke katuka na yinza yayi. Na yina, bima nionso na ntoto kele kaka kifwani ya yina kele na Zulu. Bima nionso yina kele mbote, bima nionso ya kusungama, bima nionso yina kele ya kitoko, bayinti, bandeke, bima nionso, kele kaka kifwani ya yina kele na Zulu.

<sup>52</sup> Luzingu ya beto mosi kele kaka kifwani. Ya ke kaka kivudi, mpe kima ya kieleka ve. Ya ke lweka ya kieleka ve. Ya ke lomba lufwa samu na kubasisa foto yango, samu na kuvutula beto na théophanie kisika beto me katuka. Na yina na kilumbu ya mvumbukulu beto ke fwanana na Yandi, nzutu yina me vumbuka na lufwa. Wapi mutindu kitoko; kitoko kaka ve, kasi ya kele ya kieleka, Kieleka ya ngolo ya Ndinga ya Kukonda nsuka ya nsuka, ti beto ke vwanda mutindu Yandi.

<sup>53</sup> Beno tala ntangu yayi, Yesu, vwandaka na bangolo nionso ya Nzambi, kasi, ntangu Yandi kutanaka na Satana, Yandi sadilaka ata fioti ve mosi ya bangolo ya Yandi. Yandi sadilaka kaka Ndinga! Yandi salaka yawu. Yandi tubaka, “Ya me sonamaka, ‘Muntu ke zinga kaka ve na dimpa, kasi na Ndinga nionso ke basika na yinwa ya Nzambi.’”

<sup>54</sup> Na yina wapi mutindu beno lenda tuba ti beno lenda bikala na yinzo mpe kuvwanda kaka Muklisto ya mbote mutindu beno zolaka vwanda na yinzo-Nzambi? Beno lenda sala yawu ve. Beno tanga Ndinga! Mpeve-Santu ke disaka na Ndinga. Biblia kele madia ya kimpeve ya Nzambi samu na Dibundu ya Yandi. Mpe Mpeve-Santu kele Yandi Yina ke nataka Yawu na beno mpe ke tulaka Yawu na kati ya ntima, mpe na matondo beno ke mwangisila Yawu masa. Mpe nsilulu nionso ya Kinzambi ke basisa kaka ya kieleka yina Nzambi tubaka ya ke sala. Ya ke sala yawu. Ya ke Ndinga ya Yandi, mpe Ya kele Luzingu.

<sup>55</sup> Ntangu yayi, mu me zimbana ti mu zolaka vwanda kaka na kati-kati ya ngunga. Ya me baka munu ntangu ya yinda samu na kukuma na yina mu zolaka kutuba.

<sup>56</sup> Kasi beno tala Yesu na ngunga ya nsuka, to zole, ya luzingu ya Yandi, bapofesi mingi, mingi salamaka.

57 Muntu mosi tubaka na munu, “Mpangi Branham, *yayi* fwana salama, mpe *yina* fwana salama.”

Mu tubaka, “Ya lendaka salama na ngunga mosi.”

58 Kana beno ke tanga Psaumes 22, mpe na manima beno tala ngunga ya lufwa ya Yandi na kulunsi, mu me zimbana ntangu yayi baprofesi yikwa ya mfumu salamaka na bangunga ya nsuka zole to tatu ya luzingu ya Yandi! Ya kieleka, “Ba me tobola makulu ya Munu mpe maboko ya Munu. Nzambi ya Munu, Nzambi ya Munu, samu na yinki Nge me yambula Munu?” mpe nionso yina, mutindu David dilaka yawu.

59 Mpe diaka kima yankaka mu ke zola ti beno kusimba, Kieleka, kitini yina ke kubwanaka ve ya Ndinga ya Nzambi. Biblia me tuba, “Yandi kebaka mikwa ya Yandi nionso, ata mosi ya yawu kubukanaka ve.” Samu na kifwani, mwana-dimeme ya paki vwandaka kifwani ya yawu. Mwana-dimeme fwana vwanda kukondwa kifu, mwana-dimeme fwana vwanda ata na mukwa mosi ve ya kubukana. Mpe na ngunga yina ntangu Yandi vwandaka. . . Yandi kufwaka, ba mataka samu na kubuka makulu ya Yandi na nzundu. Mpe kaka na ntuala. . . Beno tala ntangu yina ya lukanu! Muntu na nzundu, ya kukubama samu na kubula makulu ya Yandi, kasi Ndinga ya Nzambi me tuba, “Ya ke vwanda ata na mukwa mosi ve ya kubukana na Nzutu ya Yandi.”

“Wapi mutindu ya zolaka kusalama?” Beto ke sala nswalu.

60 Ndinga ya Nzambi kele ya Kukonda nsuka! Kana Ndinga ya Nzambi kele ya kulunga, bayina kele kati na Klisto kele ya kusungama mutindu ya kieleka na kuvumbuka ya kele na mvumbukulu. Nzambi kele ya kusungama mutindu Ndinga ya Yandi me tuma, na kubeluka beno, mutindu Yandi kele samu na kuvulusa beno. Na yina, Yandi, ya ke Ndinga ya Yandi yina silaka yawu. Ya ke Ndinga ya Nzambi, mpe beto ke na muswa ve ya kukwenda ntama na Yawu. Kasi kutuba kaka, “Ya kele Kieleka.” Beno kwikila Yawu! Ata yina ke salama, beno kwikila Yawu, kaka. Ya ke mutindu yina bayankaka ya bawu zolaka kwikila Yawu, mpe ba me pekisa beto na Yawu ve. Nzambi pesaka Palestine na Israel, kasi ya lombaka ti bawu kunwana samu na konso kitini ya ntoto bawu kuzwaka. Nsilulu kele ya beno, kasi beno fwana nwana samu na konso kitini yina beno ke lomba; diabulu ke mona yawu, ya kieleka yandi ke mona yawu.

61 Kasi beno tala ntangu ba kubamaka samu na kubuka makulu ya Mfumu ya beto Yesu, kana nzundu yina zolaka bula dikulu mpe kubuka yawu, Nzambi zolaka vwanda na kifu. Kasi ya vwandaka ve na bampeve ya yimbi mingi na kati ya bakwamusu nionso ya mudidi samu na kubika nzundu yina kubula nzutu yina ya ntalu. Samu David tubaka, bamvula bankama nana na ntuala ya yina, yandi tubaka, “Ya ke vwanda

ve na mukwa mosi ya kubukana na nzutu ya Yandi.” Ndinga ya Nzambi fwana vwanda kaka Kieleka.

<sup>62</sup> Kasi na yina yinki bawu salaka? Ba bakaka dionga mpe ba kotisaka yawu na mpanzi ya Yandi, mpe Menga na masa basikaka, samu na kulungisa yina Ndinga me tuba, “Ba tobolaka maboko ya Munu mpe mpanzi ya Munu.” Ndinga lungisamaka.

<sup>63</sup> Ntangu yayi ntangu Yandi vwandaka kufwa, oh, yinki ngunga yayi ya kiadi! Mu ke banza na nkunga yina, mpe, ya kuvedila, ya ke pesaka munu kiadi, ntangu mu ke banza nkunga yina muyimbi sonikaka bamvula mingi me luta.

Matadi pasukaka mpe mpimpa kubwaka,  
Mvulusi ya munu kulumusaka yintu ya Yandi  
mpe Yandi kufwaka;  
Kuzibuka ya vwale monisaka nzila  
Na biese ya Mazulu mpe kilumbu ya kukondwa  
nsuka.

<sup>64</sup> Mpe ntangu ba komaka yandi kuna Yandi, menga vwandaka basika mpe vwandaka kufwa, ntangu Yandi kulumusaka yintu ya Yandi, mwini monaka nsoni ya yandi mosi, samu na kutala bivangu ya lufwa yina Nzambi salaka na kifwani ya Yandi, zolaka futa ntalu ya mutindu yina samu na kuvuukisa bawu, mwini mangaka na kutala na zulu ya ntoto na ngunga yina. Ngonda kotaka na mubulu na mutindu ti yandi katukaka na kisika ya yandi. Mpe bambwetete pesaka mukongo na ntoto. Wapi diambu ya kiadi disumu fwana vwanda! Wapi mutindu Nzambi zolaka sala na yawu!

<sup>65</sup> Mpe kumona banganga-Nzambi yina vwandaka kuseka, na mate na zulu ya kizizi ya Yandi. Muntu mosi bulaka Yandi na yintu, na didiadia, mpe tubaka, “Kana Nge kele Profete, tuba na beto nani me bula Nge.” Mosi na kati ya bawu bendaka mandefu na kizizi ya Yandi, mpe bulaka Yandi ngolo na kizizi, mpe zolaka ti Yandi kunwana samu na Yandi mosi.

<sup>66</sup> Yandi tubaka, “Kana Kimfumu ya Munu vwandaka ya yinza yayi, Mu zolaka na nswalu nionso kubokila Tata ya Munu, Yandi zolaka fidisa Munu bimvuka kumi na zole ya Bawanzio.”

<sup>67</sup> Diambu zolaka soba, kasi wapi mutindu Yandi zolaka sala yawu? Yandi zolaka kaka kusala yawu ve, samu ti ya vwandaka bana ya Yandi mosi yina vwandaka lomba Menga ya Yandi. Beno lenda banza na papa, tata, na bana ya yandi mosi (na kati ya mudidi) ke na kulomba menga ya tata ya bawu? Ya kele samu na yina Yandi zolaka sala kima yankaka ve kasi kufwa. Kana Yandi salaka yawu ve, ya zolaka vwanda lufwa ya bana ya Yandi, ya zolaka vwanda lufwa ya bivangu ya Yandi. Kasi Yandi zolaka kufwa, samu na kuvulusa bantu ya Yandi.

<sup>68</sup> Mpe ntangu Yandi salaka yawu, ntangu Yandi kulumusaka yintu ya Yandi, ntoto yayi ya ntama kuzwaka kuningana ya ngolo. Ya zolaka vwanda na kubwa ya ngolo, samu Biblia me

tuba ti “ntoto ya muvimba, kubanda na ngunga ya sambanu tii na ngunga ya yivwa, ya vwandaka mpimpa, ya vwandaka na zulu ya ntoto ya muvimba.” Mpe ntoto ninganaka, mpe matadi pasukaka. Mpe vwale ya tempelo pasukaka kubanda na zulu tii na nsi; ba-bloc ya munkayulu balukaka. Mwana ya Nzambi ya moyo kufwaka. Yandi kufwaka na mutindu ti mwini ndimaka yawu. Yandi kufwaka na mutindu ti ngonda ndimaka yawu. Yandi kufwaka na mutindu ti bambwetete ndimaka yawu. Yandi kufwaka na mutindu ti ntoto ndimaka yawu. Yandi kufwaka na mutindu ti bima ndimaka yawu, ba-atimosifere ndimaka yawu. Bima nionso zolaka zaba ti Yandi vwandaka Mwana ya Nzambi! Na yina, Ndinga ya Nzambi zolaka kubwa ve, Yandi silaka, kubanda na disamba ya Eden, “Nkuna yina ke niata yintu ya nioka.”

<sup>69</sup> Ntangu yayi yinki salamaka na Yandi? Wapi Yandi kwendaka ntangu Yandi bikaka kulunsi mpe kotaka na ntoni ya Joseph ya Arimathée?

<sup>70</sup> Yandi vwandaka mputu mingi ti Yandi vwandaka ve na kisika ya kutula yintu ya Yandi. Yandi butukaka na kati ya kidikilu, na nkumbu ya ndombe na manima ya Yandi, mutindu “mwana ya makangu.” Ba sekaka Yandi, ba vwezaka Yandi, ba sawulaka Yandi, na ntoto. Ba vwezaka Yandi, mpe ba losaka Yandi. Mpe ntangu Yandi kufwaka, Yandi zolaka kufwa na kulutaka na kitumbu ya lufwa ya nene, na kati-kati ya miyibi zole. Mpe ba vwandaka ve na kisika ya kuzika Yandi, mpe ba zikaka Yandi na ntoni ya muntu yankaka. Nzambi kaka ya Mazulu me kwisa na ntoto! Nani beto ke banza ti beto kele, yina fwana luta na kati ya mwa bampasi? Yina Yandi salaka samu na beto! Beno banza na yawu, nkundi, beno longoka yawu.

<sup>71</sup> Soda Romain tubaka, “Ya kieleka, ya kele Mwana ya Nzambi.” Nsumuki zolaka kundima yawu. Judas tubaka, “Mu me yekula Menga ya muntu yina kuzaba diambu ve.” Yandi zolaka kundima yawu. Ntoto ya muvimba ndimaka yawu.

<sup>72</sup> Na manima wapi Yandi kwendaka? Ntangu muntu ke kufwa, ya me suka kisika yina? Ve, tata. Yandi zolaka kufwa mutindu yina samu Biblia ya Nzambi me tuba ti Yandi zolaka kufwa mutindu yina. Mpe Yandi tulaka kivuvu na Ndinga ya Nzambi. Yawu yina Yandi lendaka tuba, na luzingu ya Yandi, “Beno bebisa tempelo yayi, mpe Mu ke vumbula yawu na bilumbu tatu.”

<sup>73</sup> Samu ti David tubaka, kisika mosi, kaka, na kati ya Biblia, na nsi ya lutwadusu ya kimpeve, ntangu David, muntu ya Nzambi, profete yina pakulamaka na Ndinga, tubaka, “Mu ke bika ve Muntu ya Munu ya Santu kumona kupola, to dyaka Mu ke bika ve moyo ya Yandi na kati ya difelo.”

74 Yesu tubaka, “Beno bebisa nzutu yayi, mpe Mu ke vumbula yawu na bilumbu tatu.” Yandi zabaka ti Ndinga ya Nzambi lendaka kubwa ve. Oh, la la!

75 Kana Yandi lendaka kupema swi na zulu ya yawu, kukwikila ti Ndinga ya Nzambi lendaka kubwa ve, wapi mutindu diaka beto lendaka kupema swi ti beto me butuka mbala zole na Mpeve-Santu, mpe Yawu kele mbangi na kati ya ntima ya beto kaka na ntangu yayi ti beto me zaba ti Mukudi ya beto ke zinga mpe ke kwisa diaka kilumbu mosi. Beno pema na kivuvu ti bayina kele na luzolo ya Klisto Nzambi ke nata na Yandi! Beno tala ntangu yayi.

76 Yandi vwandaka kuna. Yandi zabaka ti ata cellule mosi ve ya nzutu yina ke kupola. Bangunga makumi sambwadi na zole, kupola ke banda. Yawu yina Yandi vwandaka ata fioti ve bilumbu tatu. Yandi kufwaka na Kilumbu ya tanu na manima ya midi, Yandi vumbukaka na Lumingu na suka. Kasi, ya vwandaka na kati ya bilumbu tatu. Na kati ya bilumbu yina tatu Yandi zolaka vumbuka dyaka, samu ti Yandi tulaka kivuvu na Ndinga ya Nzambi.

77 Yandi yina me kwenda! Wapi sika Yandi kwendaka ntangu Yandi kwendaka? Biblia me tuba, “Yandi tombokaka na zulu. Yandi kwendaka mpe longaka na mioyo yina vwandaka na boloko, yina balulaka bantima ve na bilumbu ya mvibudulu ya Noé.” Moyo ya Yandi, Mpeve ya Yandi, théophanie ya Yandi ya mvwandulu ya Yandi Mosi, kulumukaka. Beto landa Yandi. Beno zola, na nkokila yayi, kulanda Yandi na mwa minuti fioti? Beto tala kisika Yandi kwendaka.

78 Kaka na nsi ya bizunga ya bantu ya kufwa ke vwandaka na kimfumu ya ngolo ya diabulu; na nsi kuna . . . kaka na zulu ya yawu ke vwandaka mioyo ya bantu ya yimbi; na nsi ya ke kisika ya kieleka ya Satana, difelo. Na yina kaka na zulu ya beto kele Mpeve-Santu; na manima na nsi ya Autel me vwanda mioyo ya bantu ya mbote; na manima ya kele Nzambi Yandi mosi. Mosi kwendaka na nsi, mosi kwendaka na zulu; bampeve zole kele awa na zulu ya ntoto, yina ke na kubendaka bantu na ntoto yayi.

79 Mpe ntangu Yesu kufwaka, Yandi tombokaka na zulu, kulumukaka kuna. Mu lendaka mona Yandi na Kilumbu yina ya tanu na manima ya midi, na manima ya lufwa ya Yandi, [Mpangi Branham me konkota—Mu.] Yandi konkotaka na kielo ya bizunga ya bantu ya kuzimbana. Beto landa Yandi na muniti mosi. Kielo zibukaka. Ya vwandaka na bakento, ya vwandaka na babakala, ya vwandaka na bamama ya bantwenia, ya vwandaka na biboba, ba vwandaka bawu nionso kintwadi na kisika yina ya boma mingi yina ba vwanda bokila boloko ya mioyo yina me zimbana.

80 Kana mu vwandaka na ntangu, mu zolaka tuba na beno. Mpe ya lendaka vwanda kaka vision. Kasi na ntangu mosi mu

kwendaka tala kisika yina, mpe mu lombaka mawa, ntangu mu vwandaka nsumuki na nsi ya lipaso. Ntangu mu basikaka, mu vwandaka ya kutelama na Wesete, na maboko ya munu ya kuzangula na Zulu, mpe kulunsi mosi vwandaka sema na zulu ya munu.

<sup>81</sup> Kasi na kisika yina ya mawa kuna, Yesu kwendaka na kielo. Bima nionso fwana kupesa kimbangi ti Yandi vwandaka Mwana ya Nzambi, samu ba longusaka bawu na bilumbu ya mvibudulu ya Noé. Yandi bulaka na kielo, Yandi tubaka, “Mu kele Yandi Yina Enoch tubilaka. Mun kele Nkuna ya kento, yina fwana kuniata yintu ya nioka. Ndinga nionso ya Nzambi lungisamaka; mu me kufwa kaka kuna na Calvaire, mpe Mu me sumba Dibuundu ya Munu. Mpe Yandi yina Enoch tubilaka, Mu kele Yandi.” Mpe ba vwandaka kukondwa mawa, kukondwa kivuvu, samu ba tumamaka ve. Mpe kielo vwandaka ya kukanga na ntwala ya bawu.

<sup>82</sup> Kuna na bizunga ya bampeve ya yimbi! Kuna na mwelo ya difelo! Yandi konkotaka na kielo. [Mpangi Branham me konkota—Mu.]

<sup>83</sup> Ya kele ntangu Yandi vwandaka na kati ya ntoni, nzutu ya Yandi, ke na kuingila mvumbukulu. Yandi talaka bisika yina muntu ya mbote mpe muntu ya yimbi kwendaka; kisika beno ke kwenda mosi ya bilumbu yayi, na kisika mosi to kisika yankaka.

<sup>84</sup> Mpe Yandi konkotaka [Mpangi Branham me konkota—Mu.] na kielo ya difelo. Mpe, ntangu Yandi salaka mutindu yina, diabulu basikaka. Mpe mu lenda kuwa yandi kutuba, “Oh, na nsuka-nsuka Nge me kwisa. Mu banzaka ya kieleka ti mu kuzwaka Nge ntangu mu kufwaka Abel.”

<sup>85</sup> Beno me mona, ntangu ba silaka Nkuna yina na disamba ya Eden, diabulu vwandaka meka ntangu nionso na kubebisa Nkuna yina. Mpe lufwa ya Abel, mpe nkwezulu ya Seth, vwandaka kaka lufwa, luzikulu, mpe mvumbukulu ya Klisto. Nkuna yina fwana landila. Mpe yandi mekaka na kubebisa Yawu.

<sup>86</sup> Yandi tubaka, “Mu banzaka ti mu kuzwaka Nge ntangu mu fwaka Abel. Mu banzaka ti mu kuzwaka Nge ntangu mu fwaka bapofete. Mu ndimaka ti mu kuzwaka Nge ntangu mu zengaka yintu ya Jean. Kasi ntangu yayi, na manima ya nionso, Nge me kwisa. Mu me kuzwa Nge ntangu yayi.” Oh, la la!

<sup>87</sup> Mu lendaka kuwa Yandi kutuba, “Satana, kwisa awa!” Yandi kele Mfumu ntangu yayi. Yandi tandaka diboko kuna, Yandi botolaka fungula yina ya lufwa mpe difelo na lweka ya yandi, Yandi namikaka yawu na lweka ya Yandi Mosi. “Mu ke zola kuzabisa nge. Nge me vuna ntangu ya yinda. Mu kele Mwana ya Nzambi ya moyo yina me butuka na bumwense. Menga ya Munu me mwangana na zulu ya kulunsi, mpe mfuka nionso me futama! Nge ke diaka ve na bamuswa. Nge me monana

pwelele. Pesa munu bafungula yina!” Ya kele kieleka. Yandi balukaka mpe bulaka yandi kieleka na dikulu, mpe kangaka kielo kintwadi, mpe tubaka, “Vwanda kuna! Mu ke Mfumu kubanda ntangu yayi.”

<sup>88</sup> Ntangu yayi, Yandi vwandaka ve na bafungula ya Kimfumu, samu Yandi pesaka yawu na Pierre; beto me mona nionso yina na suka, na mbotika ya masa. Kasi yandi vwandaka na bafungula ya lufwa mpe ya difelo, mpe Yandi bakaka yawu; na manima ya mvumbukulu ya Yandi, Yandi tubaka, “Mu ke na bafungula ya lufwa mpe ya difelo.” Pierre vwandaka na bafungula ya Kimfumu. Satana vwandaka na bafungula ya lufwa mpe difelo; kasi ntangu yayi Yesu ke na yawu, Yandi kele Mfumu.

<sup>89</sup> Awa Yandi me banda. Ya kele Paki; ntangu ke na kuluta nswalu. Kasi ya ke na kimvuka yankaka. Wapi sika Job kele? Wapi sika Abraham kele? Wapi sika bawu kele? Wapi sika kele bampangi yina tulaka kivuvu na Ndinga ya Nzambi? Yandi me zimbana bawu? Lufwa kubebisaka bawu kimakulu? Nionso yina vwandaka samu na yawu? Ata fioti ve, ata fioti ve; Nzambi fwana zitisa Ndinga ya Yandi.

<sup>90</sup> Mu lenda mona Yandi. Beto tala fioti na Paradiso, mpe beto tala kuna. Mpe mu ke mona Sarah na Abraham ke na kutambula kuna, mpe na manima ya mwa ntangu fioti [Mpangi Branham me konkota—Mu.] kima mosi na kielo. Abraham kwendaka mpe zibulaka kielo, yandi tubaka, “Cherie, kwisa awa. Tala awa! Tala awa, ya kele kaka Yandi yina telamaka na munu na nsi ya wenge kilumbu yina.” Yandi kele Nzambi ya Abraham.

<sup>91</sup> Kaka na ntangu yina mu lendaka mona Daniel kutala na zulu ya dipeka ya yandi, mpe yandi tubaka, “Ya kele Ditadi yina me katuka na mongo, ya kele kieleka kaka mutindu mu me telama awa.”

<sup>92</sup> Mu ke mona Job me vumbuka, yandi tubaka, “Ya ke Mukudi ya munu yina mu tubaka ti mu me zaba ti Yandi kele moyo, mpe kilumbu mosi Yandi ke telama na zulu ya ntoto. Nzutu ya munu lendaka vwanda ve kasi mwa lutu ya mbombi, kasi na minuti kumi na tanu mu ke vwanda na kati ya yawu diaka. Ya kele Yandi.”

<sup>93</sup> Ezéchiél talaka kuna na zulu, mpe yandi tubaka, “Mu monaka Muntu yango mosi mutindu Piné na kati-kati ya Piné, ke baluka, kuna na zulu na kati-kati ya mipepe.” Oh, la la!

<sup>94</sup> Na manima kuna kwisaka Enoch. Enoch tubaka, “Mu me mona Yandi ke kwisa na mafunda kumi ya basantu ya Yandi, samu na kubanda lusambusu.”

<sup>95</sup> Ya vwandaka na basantu ya Ngwisani ya Ntama yina vwandaka vingila, ya kieleka ya vwandaka bawu, na nsi ya mulemvo ya menga. Ba lendaka ve kukwenda na Ntwala ya Nzambi, Nzambi ya Mazulu, samu menga ya bankombo mpe ya mameme lendaka ve kukatula disumu.

<sup>96</sup> Kasi Yandi tubaka, “Bampangi ya Munu, Mu kele Yandi yina beno ke banza ti Mu kele. Mu kele Nkuna ya kento. Mu kele Mwana ya David. Mu kele Mwana ya Nzambi. Mu kele Mosi yina me butuka na bumwense. Menga ya Munu me katula yimbi samu na yawu. Beno vwandaka vingila na nsi ya menga ya mameme mpe ya bankombo, kasi ntangu yayi Menga ya Munu ke katula yimbi, mpe beno kele na kimpwanza. Beto mata, ya kele Paki.” Beno banza kaka, yina vwandaka kaka pene ya bamvula funda mosi na bankama yivwa na ndambu me luta, na nkokila yayi.

<sup>97</sup> Mu lendaka kuwa Abraham kutuba, “Mfumu, ntangu beto ke vumbuka diaka na banzutu ya beto; mpe Sarah mpe munu vwandaka kaka kuzola yawu mingi; Ya ke yangisa Nge ve kana beto bika kubula mwa sifflet, mutindu yina, na nzila ya Nge?”

<sup>98</sup> Mbote, mu lendaka kuwa Yandi kutuba, “Samu na yinki, ve, ata fioti ve. Mu ke vwanda na bilandi ya Munu pene ya bilumbu makumi yiya. Beno tala na nziunga mpe beno mona mutindu bima nionso ke monana!”

<sup>99</sup> Na suka yina ya Paki ya nkembo (kisika beto ke baka na suka, kana Mfumu me zola) ntangu Yandi vumbukaka na lufwa, Biblia me tuba, landila Santu Matthieu kapu 27, ti “Mingi ya bansatu yina vwandaka ya kulala na putulu ya ntoto, vumbukaka mpe basikaka na bantoni.” Nani ya vwandaka? Abraham, Isaac, Jacob, Job, bayina na nzila ya luzayikisu ya kimpeve yina me monisama zabaka ti Mukudi ke telama na zulu ya ntoto kilumbu mosi. Ya kele bawu, bambuma ya ntete ya bayina vwandaka ya kulala. Ba tambulaka kuna na kati ya mbanza. Mu lendaka mona Sarah mpe Abraham, bantwenia, mpe ya kufuluka na . . . mpe kitoko, mpe—mpe ya kufuluka na luzingu, ba ke vwanda diaka ve biboba, ba ke vwanda diaka bambevo ve, ba ke vwanda diaka ve na nzala ya madia, ba vwandaka tambula na banzutu ya bawu.

<sup>100</sup> Caïphe vwandaka ya kutelama kuna, yandi tubaka, “Beni zaba yinki? Ya ke na kima mosi me salama kilumbu yina, beno tala kaka mvindu yayi kele na tempelo yayi! Ya kele. . . Beto ke kuzwa muntu mosi samu na kutunga rideau yina. Beno tala kuna, bwati ya munkayulu ya kubaluka. Yinki me salama? Bakala yina vwandaka astrologue? Yandi vwandaka ngangankisi? To, yinki me salama? Beno tala! Beno kwisa awa, Josephus, banani kele bankwelani ya bantwenia yina me telama kuna?”

Abraham tubaka, “Sara, ba me zaba beto. Beto ke sala mbote na kubasika.”

<sup>101</sup> “Ya salamaka na bantu mingi!” Yina vwandaka nionso ya yawu ve. Samu na kumanisa, beno tala. Kilumbu mosi ntangu na manima Yandi vwandaka . . . ba kwendaka kutala; Abraham, Isaac, Jacob, mpe bayankaka nionso kwendaka kutala yinsi ya bawu. Ntangu Yesu tombakaka na zulu. . .



102 Beno ke tuba, “Mpangi Branham, ya kele disolo?” Ve, tata! Mu ke talisa beno na Masonuku, na muniti mosi.

103 Ntangu Yandi bandaka na kumata, bawu kaka monaka Yandi, kasi basantu ya Ngwisani ya Ntama kwendaka na Yandi, samu Biblia me tuba ti “Yandi nataka bankole, mpe pesaka bawu makabu.” Mpe mu lendaka mona Yandi mutindu Yandi mataka na zulu, mpe vukanaka na dibuundu ya Yandi.

104 Bawanzio zole na kati ya kimvuka yina vwandaka bula musiki, kwisaka kuna, mpe tubaka, “Beno bantu ya Galilée, samu na yinki beno ke tala na zulu? Samu Yesu yina mosi, yina ba me zangula, ke kwisa vutuka diaka.” Ya kieleka! Ba kwendaka nswalu samu na kukota na ndonga.

105 Mpe kuna na kati ya matuti Yesu mpe basantu ya Ngwisani ya Ntama kwendaka. Ba lutaka ngonda, ba lutaka mwini, ba lutaka bambwetete. Mpe ntangu ba kotaka na ntwala ya Mazulu yina ya nene, ya kitoko ya mpembe, basantu ya Ngwisani ya Ntama bokaka, na kutangaka Masonuku, “Beno zanguka, beno mielo ya seko, mpe beno zanguka! Beno zanguka, beno mielo ya seko, mpe beno zanguka! Mpe beno bika Ntinu ya Nkembo kukota!”

106 Bawanzio nionso vukanaka na zulu ya makunzi ya Mazulu, mpe tubaka, “Nani kele Ntinu yayi ya Nkembo?”

107 Basantu ya Ngwisani ya Ntama tubaka, “Mfumumu ya makesa, ngolo na bitumba! Yandi kele Munungi!”

108 Wanzio finaka buto ya nene, mpe mielo ya musanga zibukaka na nswalu nionso.

109 Kaka kuna na Mbanza ya Jérusalem kwisaka Munungi ya nene, ya ngolo, na kunataka basantu ya Ngwisani ya Ntama. Kimvuka ya Bawanzio ke na kubula, mutindu Bawanzio ke na kuboka. Yandi vwandaka Munungi ya ngolo! Yandi vwandaka na bafungula ya lufwa mpe ya difelo ya kunamika na lweka ya Yandi, na kulutaka kuna na bayinzo ya mfumu ya Nkembo tii Yandi kumaka na Kiti ya kimfumumu. Mpe Yandi tubaka, “Tata, bawu yayi. Ba me kwikila, na lukwikilu na Ndinga ya Nge, ti Mu ke kwisa kilumbu mosi. Mu me nunga lufwa mpe difelo.” Yinki ya vwandaka, mpangi-bakala? Yandi vwandaka na bamputa na diboko ya Yandi, samu na kutalisa ti Yandi vwandaka na bitumba. Nkembo na Nzambi kuna na Zulu! Yandi kele Munungi yina ya ngolo! “Bawu yayi, Tata; Abraham, Isaac, mpe Jacob.”

110 Mu lendaka kuwa Yandi kutuba, “Mwana, mata awa na lweka ya Munu, mpe vwanda tii kuna mu ke tula bambeni nionso na nsi ya makulu ya Nge.” Mpangi, kilumbu mosi Yandi ke kwisa diaka, mpe yinki kilumbu yayi ya ke vwanda!

111 Yandi vwandaka kanga ve maboko ntangu Yandi vwandaka na ntoni. Beto ke banza ti Yandi vwandaka kaka ya kulala kuna, ya kufwa. Kasi Yandi vwandaka kuna samu na kununga, Yandi

kulumukaka kuna mpe botolaka bafungula na Satana, Yandi ke na bafungula ya lufwa mpe difelo, na nkokila yayi. Yandi tubaka, “Samu Mu ke zinga, beno lenda zinga, mpe.”

<sup>112</sup> Mu ke kukiyufula na nkokila yayi, mpangi ya munu ya bakala ya luzolo, mpangi-kento, beno me banzaka na yawu na mutindu ya kieleka? Beno me bakula ti beno ke zinga kaka samu Yandi ke zinga? Beno me zola yawu mingi na kukipesa beno mosi, mpe kutuba, “Nzambi, munu yandi yayi, nsumuki, wila munu mawa?” Beno me ndimaka ntete ve Munkayulu yina ya kulunga? Beno me tubaka ntete na Yandi ti beno ke zolaka Yandi? Ya ke lwadisaka bansatu ya beno ntangu beno ke salaka yimbi? Kana beno me kumaka ata fioti ve na nzingulu yina ntangu yayi, na kutula na ntoni yayi! Na yina, ntangu ya beto ke na kuluta. Kuvwanda kaka na nsatu ya mbote! Kasi, mu ke kukiyufula, kana beno ndimaka ntete ve Klisto mutindu Mvulusi ya beno mosi, Mu ke kukiyufula kana beno ke sala yawu na yina beto ke kulumusa bayintu ya beto na mwa ntangu fioti na mpova ya kisambu.

<sup>113</sup> Bula yawu, *Matadi Pasukaka Na Kati-kati*, kana nge me zola, Mpangi-kento Gertie, kana nge ke na yawu. Mbote mingi, yina nge zola.

<sup>114</sup> Na bayintu ya beto ya kukulumusa, mu ke fuyula beno kiuvu mosi ya kieleka. Beno bambuka moyo bankundi, nsumuki to santu, beno me sekisa ve na kuzinga ntangu ba me zika beno. Moyo ya beno kele kisika mosi kuna. Ntangu yayi, Yesu talaka bisika yina zole, landila Masonuku. Wapi kisika Yandi ke kutana na beno kana beno ke kwenda na nkokila yayi? Beno ke vwanda kielo ya mawa ya kukanga na ntwala ya beno, samu ba me losa beno? Beno bambuka moyo, Yandi kele kaka Mvulusi ve, Yandi kele Zuzi. Nge kele zuzi ntangu yayi, wapi mutindu nge ke sambisa Yandi? Bika Yandi vwanda Mvulusi ya nge ntangu yayi.

<sup>115</sup> Mwa disolo ya fioti me kwisa na dibanza ya munu. Mwa ntangu fioti me luta mwana-bakala mosi ya fioti vwandaka ya kuvwanda na wagon. Munduki mosi bulaka kuna na bala-bala, mpe bampunda tinaka mbangu, ya vwandaka kwenda na zulu ya falaise. Bouvier mosi ya ntwenia kwendaka mbangu mpe telemisaka bampunda kaka na ntwala ya wagon yina vwandaka kwenda na zulu ya falaise, samu ya vwandaka na bébé na kati ya yawu. Yandi vulusaka luzingu ya mwana yina ya fioti.

<sup>116</sup> Bamvula mingi na manima ya yina, ya vwandaka ya kutelama na yinzo ya lusambusu. Mwana-bakala yayi mosi bukaka musiku, yandi bakaka nzila ya yimbi, ya vwandaka ya kubwa. Yandi vwandaka kunwa malafu, ya vwandaka bula bansaka ya mbongo, yandi kufwaka muntu na munduki; mpe yandi vwandaka ya kubwa, yandi monanaka ya kubwa. Mpe zuzi telemaka mpe tubaka, “Mu ke pesa nge kitumbu ti ba kanga nge nsinga na nkingu tii kuna nge ke kufwa.”

117 Bakala yina ya ntwenia tubaka, “Zuzi!” Mpe yandi bukaka ndonga ya lusambusu, na yina yandi dumukaka na zulu ya barre mpe yandi kubwaka na makulu ya zuzi, samu na mawa. Yandi tubaka, “Zuzi, tala munu na kizizi! Nge me zaba munu ve?”

Yandi tubaka, “Ve, mwana, mu me zaba nge ve.”

118 Yandi tubaka, “Nge ke bambuka moyo na mwana-bakala mosi ya fioti yina nge vulusaka, bamvula mingi me luta, na mbangu ya bampunda?”

Yandi tubaka, “Yinga, mu me bambuka moyo na yawu.”

119 Yandi tubaka, “Mu kele mwana-bakala yina.” Yandi tubaka, “Zuzi, nge vulusaka munu kuna. Vulusa munu ntangu yayi!”

120 Zuzi talaka yandi, mpe yandi tubaka, “Mwana, kilumbu yina mu vwandaka mvulusi ya nge. Bubu yayi, mu kele zuzi ya nge.”

121 Bubu yayi Yandi kele Mvulusi ya nge, nsumuki, mbasi Yandi lendaka vwanda Zuzi ya nge. Beto banza na yawu ntangu yayi, ntangu musiki ke bula. Mpe muntu nionso kusambila, bayina kele na bisika ya kisambu na Nzambi.

122 Mu ke kukiyufula na nkokila yayi na ntangu yayi, na nswalu nionso, bayina ke zola kundima Klisto mutindu Mvulusi ya nge mosi, beno tuba, “Nzambi, wila munu mawa, nsumuki. Mu ke zola kukwisa na nzila ya Menga yina me tiamuka. Mu me lemba na kukota na mabuundu mpe kukwenda mbangu sika na sika. Mu ke zola kubutuka mbala zole. Mu ke zola nzingulu na kati ya ntima ya munu ti mu zaba ti Klisto me monisama Yandi mosi na munu, na nzila ya luzayikisu ya kimpeve yina nge me tubila, Mpangi Branham. Mu ke zola luzayikisu ya kimpeve, Mpeve-Santu na kati ya ntima ya munu, ke sala ti mu zinga, samu na kukumisa Klisto ya kieleka diaka na munu kulutila yina mu kele samu na munu mosi. Mu ke zola nzingulu yina, Mpangi Branham. Nge zola sambila samu na munu mutindu mu me telemisa diboko ya munu?” Beno zola telemisa diboko ya beno ntangu yayi, yina ke zola ti ba bambuka moyo na yandi. Nzambi sakumuna nge, mama. Nzambi sakumuna nge kuna na manima, mama. Ya kele mbote. Nzambi sakumuna nge, tata. Ya kele mbote. Beno telemisa maboko ya beno, ntangu yayi beno bika diboko ya beno na zulu.

123 Wapi mutindu beno ke vwanda na nsoni? Beno lendaka losa kima ya mutindu Yina, nkundi? Beno bambuka moyo.

124 “Oh,” beno ke tuba, “Mpangi Branham, balongi me longa bamvula mingi.” Mu zaba, kasi mosi ya bilumbu yayi ba ke sukisa na kulonga. Mpe mutindu bima ke monana, ya lendaka vwanda kaka na ntangu yayi. Beno ke kuwa dilongi ya beno ya nsuka. Ya kieleka, yayi lendaka vwanda dilongi ya beno ya nsuka.

125 “Oh,” beno ke tuba, “Mu kele ntwenia.” Ya ke sala kima mosi ve. Lufwa ke zitisaka muntu ve, to mvula to kiyeka.

126 Nge ke ndima Yandi ntangu yayi mutindu Mvulusi ya nge mosi, na kutelemisaka diboko ya nge, na kutubaka, “Nzambi, wila munu mawa”? Beno telemisa maboko ya beno na yankaka yayi, mpe beno tuba, “Ntangu yayi mu ke zola kundima Klisto.” Beno zola telemisa diboko ya beno?

127 Muntu yina kele retrograde, yandi tuba, “Nzambi, wila munu mawa. Mu ke zola kuvutuka na Klisto na nkokila yayi, ti mbasi lendaka vwanda mvumbukulu, ya malu-malu, samu na munu.” Beno zola kutelemisa maboko ya beno? Beno telemisa diboko ya beno, beno tuba, “Wila munu mawa. Mu ke zola kukwisa ntangu yayi.” Beno ke sala yawu? Beno telemisa diboko ya beno, beno tuba, “Mu vwandaka retrograde, kasi na nkokila yayi. . .” Nzambi sakumuna nge, mama. Nzambi sakumuna nge. Ya kele mbote. “Mu ke ndima Klisto mutindu Mvulusi ya munu mosi. Mu ke ndima Yandi na nkokila yayi. Mu me yenga-yenga, bamvula mingi ntama ya Nzambi, kasi ntangu yayi mu me vutuka na yinzo.” Beno ke ndima Yandi na nkokila yayi, ti yayi lendaka vwanda mvumbukulu ya malu-malu samu na beno, luzingu ya beno ya ntama lendaka kusuka?

128 Mama yayi ke na kukwisa na autel, samu na kundima masumu ya yandi, samu na kutelama. Muntu yankaka ke zola kubaka kisika ya bawu awa, kukwisa awa na yandi, na zulu ya kundima ya bawu? Beno ke zola kutelama, mpe kukwisa na autel, mpe. Autel kele ya kuzibuka. Ya kieleka. Beno kwisa kaka na ntangu yayi, kaka na ntangu yayi. Kana beno me zola kutelama awa mpe kusambila, ya ke vwanda kaka mbote mingi. Beno kwisa. Beno zola kukwisa? Na zulu ya kundima ya lukwikilu ya beno, na zulu ya kundima ya beno na Mwana ya Nzambi, beno zola kwisa ntangu yayi? Mbote mingi.

129 Ya me tala beno, beno ke bambuka moyo. Nge kele yandi yina. Nge kele nsumuki? Nge ke retrograde? Nge ke madidi mpe ntama na Klisto? Mpe beno ke zola kuvumbuka ya malu-malu na Yandi na ntangu yayi, kubanda luzingu ya malu-malu? Wapi mutindu samu na beno, bakala na kento ya makwela yina me vwanda na—me vwanda na nganda ntangu ya yinda, na kuswanaka na yinzo ya beno? Beno zola kukwisa ve mpe kusungika kima yina na Nzambi mpe mosi na yankaka ntangu yayi? Kusala Paki ya kieleka Paki samu na beno, kubanda yinzo ya malu-malu.

130 Wapi mutindu samu na beno yina me vwandaka ata fioti ve, yina me vwandaka ata fioti na kisambu na yinzo ya beno, beno katuka na yinzo-Nzambi beno ke vutuka na yinzo mpe beno ke meka na kuzinga na mutindu ya kulutula mbote beno lendaka, ata fioti ve beno me vukisaka dibuta kintwadi mpe kusambila? Yawu yina beto kele na buyawuli ya bana mpe bima beto ke na yawu. Yawu yina mabuta ya ba-Américain me panzana. Beno zola kwisa ve, samu na kubanda ya malu-malu? Beno zola kusala

yawu? Ba me bokila beno. Beno bambuka moyo, mu kele longi ya beno ntangu yayi; mu ke vwanda mbangi na kilumbu yina.

Na ntangu beto me kulumusa bayintu ya beto, na yina, ntangu yayi samu na kisambu.

<sup>131</sup> Tata ya beto ya Mazulu ya Kusakumuka, na nkokila yayi beto me nata na Nge nkonga ya bantu yayi, na kati ya lembami ya kulutula santu yina beto me zaba kusala. Beto me belama na Kiti ya Nge ya kimfumu na kukikulumusana nionso. Mpe na manima ya Nsangu ya nkokila yayi, ti, kutula na ntoni yina ya nene, Yandi vwandaka swi ata fioti ve, moyo ya Yandi kwendaka mbala mosi na bizunga mpe manisaka kisalu ya Nzambi, yina ba tumaka Yandi na kusala. Mpe mbasi na suka, beto ke mona kisika Yandi zabukaka bimfumu ya mazulu, Yandi nungaka bima nionso, na mvumbukulu ya Yandi. Kasi Yandi basikaka na Paki na suka samu na lunungu ya beto. Mpe beto ke mona ti Yandi fidisaka Mpeve-Santu, samu na kufundisa bantu ya disumu.

<sup>132</sup> Mpe beto ke sambila na nkokila yayi, Mfumu, ti bayina me vumbula maboko ya bawu bika ti ba bambuka bawu na ntwala ya Nge. Bika lukanu ya bawu kukatuka na kati ya bantima ya bawu na nkokila yayi, ti ba me ndima Nge, mpe ba me kwikila Nge, mpe bika ti ba vwanda na kidimbu na nzila ya Kidimbu ya nsilulu na nkokila yayi, Mpeve-Santu. Pesa yawu, Tata. Na yina, beto ke pesa bawu na Nge, na Nsangu yayi na nkokila yayi. Bika Ya sakumuna bayina me kuwa Yawu, bayina, Mfumu, bayina ke nata Yawu na yinzo ya bawu, mpe kotisa Yawu na kati ya bantima ya bawu. Bika ti bawu kuzinga na Ndinga ya Nzambi. Pesa yawu, Tata, samu beto ke lomba yawu na Nkumbu ya Klisto. Amen.



*KUTULA NA NTONI* KNG57-0420  
(The Entombment)

BANDANDANI YA REVEIL YA PAKI

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na nkokila, na kilumbu ya 20 na Ngonda ya yiya, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)